



Ollscoil Mhá Nuad Maynooth University

Lárionad na Gaeilge, Scoil an Léinn Cheiltigh Bainisteoir Tionscadail - Snas.ie (Conradh Sealadach go dtí 31.08.2028, 0.8 FTE)

An Ról

Tá Ollscoil Mhá Nuad tiomanta do straitéis ina bhfuil spriocanna bunaidh sin na hOllscoile, barr feabhais sa taighde agus sa scoláireacht agus oideachas den chéad scoth, fite fuaite ina chéile agus an meas céanna orthu.

Tá duine cumasach á lorg ag an Ollscoil le bainistiú a dhéanamh ar an tionscadal www.snas.ie agus le forbairt a dhéanamh ar na hacmhainní teagaisc agus foghlama atá ar fáil ann. Beidh an té a cheapfar freagrach do Stiúrthóir Lárionad na Gaeilge: Taighde, Teagasc agus Tástáil.

Príomhdhualgais

Beidh ar an mBainisteoir Tionscadail tabhairt faoi pé dualgais a shonróidh an Ollscoil taobh istigh d'uaireanta oibre an chonartha, i sásamh Stiúrthóir Lárionad na Gaeilge. Féadfaidh na dualgais seo a leanas a bheith i measc na ndualgas sin, ach níl siad teoranta dóibh:

- Acmhainní teagaisc agus foghlama a fhorbairt bunaithe ar shiollabais TEG (Teastas Eorpach na Gaeilge) ag leibhéil éagsúla, go háirithe ag leibhéil A1, A2 agus C1;
- Comhordú a dhéanamh ar an togra, SnasTV. Comhoibriú le dearthóir(i) na n-acmhainní éagsúla bunaithe ar Nuacht TG4 agus ar chlár eile de chuid TG4, agus tacú le forbairt, dearadh agus próféamh na n-acmhainní nuair is cuí;
- Barr feabhais a chur ar an suíomh agus ar na hacmhainní, bunaithe ar aiseolas na n-úsáideoirí agus na bpáirtithe leasmhara, agus é a choinneáil cothrom le dáta i gcónaí;
- Aiseolas a bhailiú ó úsáideoirí snas.ie (múinteoirí agus foghlaimoirí ag leibhéil éagsúla agus in earnálacha éagsúla, chomh maith le heagraíochtaí Gaeilge agus oideachais), faoina gcuid riachtanas agus faoi éifeacht an tsuímh agus na n-acmhainní;
- Anailís leanúnach a dhéanamh agus tuairiscí a réiteach maidir le staitisticí úsáide an tsuímh/ na n-acmhainní, le léargas breise a fháil ar phróifíl agus riachtanais na n-úsáideoirí agus ar na hacmhainní is mó tóir;
- Coinneáil bord ar bord leis an taighde idirnáisiúnta maidir le hacmhainní éifeachtacha teagaisc agus foghlama do theangacha, agus maidir leis na forbairtí is déanaí a bhaineann leis an bhfoghlaim ríomhchuidithe teanga, chun bearnaí agus deiseanna nua forbartha agus nuálaíochta i gcomhthéacs na Gaeilge a aithint;

- Comhoibriú go héifeachtach agus dea-chaidreamh a fhorbairt le páirtithe seachtracha, ar nós Foghlaim TG4, comhlachtaí léiriúcháin, dearthóirí seachtracha agus eagraíochtaí oideachais;
- Feachtais éifeachtacha phoiblíochta/feasachta maidir le hacmhainní snas.ie (idir SnasTV agus Acmhainní TEG) a phleanáil agus a bhainistiú, i gcomhar le páirtithe eile seachtracha nuair is cuí, agus monatóireacht a dhéanamh ar an dul chun cinn;
- Seisiúin eolais, cuir i láthair agus ceardlanna oiliúna do mhúinteoirí a thabhairt ar líne agus ag comhdhálacha agus ag imeachtaí a bhaineann le teagasc agus foghlaim na Gaeilge, chun feasacht a ardú maidir le hacmhainní snas.ie, agus chun tacú le múinteoirí úsáid éifeachtach a bhaint astu agus iad a chur in oiriúint do ghrúpaí éagsúla foghlaimeoirí.

Beidh ag an iarrthóir is oiriúnaí:

Critéir riachtanacha:

- Céim onóracha agus iarchéim sa Ghaeilge agus/nó san Oideachas nó in ábhar eile cuí;
- Ardleibhéal inniúlachta agus cruinnis sa Ghaeilge, idir scríofa agus labhartha (C1 TEG nó a chomhionann);
- Taithí ar a bheith ag dearadh acmhainní teagaisc agus foghlama do theangacha, agus sárthuisicint ar an dea-chleachtas agus ar an nuálaíocht a bhaineann leis an réimse sin;
- Sárscileanna riaracháin, eagrúcháin agus bainistíocht tionscadail;
- Sárscileanna cumarsáide, idirphearsanta agus obair bhuíne;
- Sárscileanna maidir le gnéithe ábhartha den nuatheicneolaíocht, m.sh. an fhoghlaim ríomhchuidithe teanga, taifeadadh agus eagarthóireacht fuaime agus físe, eagarthóireacht ar shuíomh gréasáin (Wordpress), dearadh grafaice (Canva, Adobe, srl.), an mhargaíocht dhigiteach agus an phoiblíocht ar na meáin shóisialta (Instagram, Tiktok, srl.) agus an intleacht shaorga;
- Cur chuige tionscantach, cruthaitheach agus críochnúil.

Dámh agus Institiúidí Taighde

Tá Dámh na nDán agus na nDaonnachtaí comhdhéanta de Ranna na Sean-Chlasaicí, na Staire, an Cheoil, na Fealsúnachta, Scoil an Léinn Cheiltigh, Scoil na Nuatheangacha, na Litríochtaí agus na gCultúr, Roinn an Bhéarla, Roinn Staidéar ar na Meáin agus an institiúid taighde, an Institiúid Ealaíon agus Daonnachtaí. Is é ról na Dáimhe comhordú a dhéanamh ar ghníomhaíochtaí acadúla na rann éagsúil, maoirseacht a dhéanamh ar fhorbairt straitéiseach na rann agus tacú le gníomhaíochtaí agus le clár idir-rannacha. Tá roinnt institiúidí idirdhisciplíneacha ceaptha ag an Ollscoil freisin chun tacú le taighde den scoth agus chun cumas taighde a fhorbairt sna disciplíní ar fad.

Lárionad na Gaeilge: Taighde, Teagasc agus Tástáil

Is aonad de chuid Scoil an Léinn Cheiltigh é Lárionad na Gaeilge, a tháinig in áit Ionad na dTeangacha agus atá ag tógáil ar an obair cheannródaíoch a rinneadh san Ionad ar feadh breis is fiche bliain. Is é misean Lárionad na Gaeilge teagasc agus oiliúint teanga ar ardchaighdeán a chur ar fáil, a fhreagraíonn d'athruithe i gcomhthéacs an oideachais san Ollscoil féin, sa phobal a bhfreastalaíonn an Ollscoil air agus ar bhonn idirnáisiúnta.

I dteannta leis an teagasc teanga a dhéantar do Roinn na Nua-Ghaeilge, do ranna eile ollscoile, don fhoireann agus don phobal i gcoitinne, tairgeann an Lárionad an Diplóma Iarchéime agus an MA san Aistriúchán agus san Eagarthóireacht (ar líne), an Teastas i Múineadh na Gaeilge (ar líne), an Dianchúrsa i Scríobh na Gaeilge (ar líne) agus Teastas Eorpach na Gaeilge (TEG). Is gné thábhachtach d'obair an Lárionaid na gníomhaíochtaí for-rochtana idir na cúrsaí ar líne thuasluaite agus ionaid scrúduithe TEG ar fud na hÉireann agus thar lear. Chomh maith leis na cúrsaí agus na scrúduithe, cuirtear acmhainní d'fhoghlaimeoirí Gaeilge ar fáil ar an suíomh www.snas.ie.

Bunaítear obair an Lárionaid ar an taighde agus an dea-chleachtas i réimse an mheasúnaithe teanga agus na teangeolaíochta feidhmí agus is gnách linn tograí taighde a thógáil ar láimh agus comhdhálacha a réachtáil sna réimsí seo. Déanann muid measúnú teanga chomh maith do ranna acadúla eile in Ollscoil Mhá Nuad agus in ollscoileanna eile mar chuid de thograí taighde.

Tá teist na nuálaíochta ar obair an Lárionaid ó bunaíodh é agus féachann muid i dtreo an dea-chleachtais idirnáisiúnta lena chinntiú go mbíonn an taighde, teagasc agus tástáil, atá mar chrann taca na hoibre, ar an gcaighdeán is airde. Is é Lárionad na Gaeilge ball na hÉireann san *Association of Language Testers in Europe* (ALTE) agus bronnadh Q-Mharc ALTE ar an Lárionad faoi dhó do scrúduithe TEG. Tá an Séala Eorpach Teanga bainte trí huaire ag an Lárionad.

Snas.ie

Tá Lárionad na Gaeilge ag forbairt acmhainní do lucht teagaisc agus foghlama na Gaeilge le breis is 25 bliain. Ba é **Vifax** an chéad sampla d'ábhar dílis foghlama a cuireadh ar fáil don Ghaeilge, bunaithe ar fheasacháin nuachta ó TG4. Nuair a cuireadh tús leis sa bhliain 1998-9, bronnadh an Séala Eorpach Teanga air as an nuálaíocht a bhain leis. Agus é 25 bliain ar an bhfód in 2023, rinneadh athbhrandáil agus uasdátú an-chuimsitheach ar Vifax faoin ainm nua **SnasTV**, agus cuireadh pacáistí nua acmhainní ar fáil ar an múnla céanna, bunaithe ar shobalchlár móréilimh TG4, Ros na Rún. Tá pacáiste nua á fhorbairt faoi láthair bunaithe ar an tsraith, Saol Ella, agus cuirfear pacáistí eile den chineál céanna ar fáil sna blianta atá amach romhainn, i gcomhar le Foghlaim TG4.

Chomh maith le Vifax/SnasTV, tá acmhainní teagaisc agus foghlama uasdátaithe curtha ar fáil ag an Lárionad bunaithe ar shiollabais **TEG** (Teastas Eorpach na Gaeilge) ag leibhéil B1 agus B2, agus tá ábhar oiliúna do mhúinteoirí a bhaineann leis an **Teastas i Múineadh na Gaeilge** curtha ar fáil againn go poiblí le roinnt blianta anuas.

Tá na hacmhainní sin ar fad ar fáil anois ar www.snas.ie, áit ar féidir cuardach a dhéanamh ar acmhainní éagsúla de réir téamaí, scileanna, agus leibhéil chumais. Tá sé mar aidhm ag an Lárionad forbairt bhreise a dhéanamh ar shuíomh agus ar acmhainní www.snas.ie sna blianta atá amach romhainn le go mbeidh sé ina lárphointe acmhainní do lucht teagaisc agus foghlama na Gaeilge.

An Ollscoil

Is ollscoil faoi leith í Ollscoil Mhá Nuad, institiúid choláisteach atá dírithe ar na daonnachtaí agus ar na heolaíochtaí sóisialta, ar an eolaíocht agus ar an innealtóireacht, chomh maith leis an taighde, an teagasc agus an rannpháirtíocht sa phobal. Tá an Ollscoil suite i Maigh Nuad, an t-aon bhaile ollscoile in Éirinn, agus cuireann stair agus oidhreacht uathúil an bhaile go mór le carachtar agus le féiniúlacht na hinstitiúide. Cuirtear oideachas ar ardchaighdeán ar fáil do bhreis is 15,000 mac léinn ar an gcampas, áit a bhfuil stair an 18ú haois agus nuálaíocht an 21ú haois araon ag baint léi.

Ó bunaíodh Ollscoil Mhá Nuad mar ollscoil phoiblí neamhspleách 25 bliain ó shin, tá forbairt shuntasach straitéiseach agus éachtaí as cuimse déanta aici, rud atá ina údar iontach mórtais ag baill foirne, ag mic léinn, ag céimithe agus ag pobal na hOllscoile araon. In 2024, aithníodh Ollscoil Mhá Nuad i measc an 90 ollscoil óg is fearr ar domhan, nuair a tháinig sí sa 86ú háit de réir Times Higher Education (THE). Tá an dea-cháil atá ar Ollscoil Mhá Nuad ar fud an domhain bunaithe ar roinnt gnéithe; ina measc, nuálaíocht, ardchaighdeán, tábhacht agus tionchar a cuid taighde agus scoláireachta; an tiomantas don oideachas agus don fhoghlaim; caighdeán na gclár acadúil; agus an cheannaireacht atá léirithe aici chun an rannpháirtíocht san ardoideachas a leathnú. Is iad tiomantas na mball foirne agus fuinneamh agus rannpháirtíocht na mac léinn is cúis leis an rath seo atá ar an Ollscoil.

Is áit í Ollscoil Mhá Nuad a bhfuil roinnt codarsnachtaí ag baint léi; institiúid nua-aimseartha í atá ag fás go tapa, agus í dírithe ar an taighde agus í rannpháirteach i sochaí an lae inniu, ach tá sí fréamhaithe

freisin sna buanna acadúla agus sna traidisiúin léinn a bhaineann léi go stairiúil. Cuireann an Ollscoil réimse leathan clár fochéime, iarchéime agus dochtúireachta ar fáil do bhreis is 15,000 mac léinn sna daonnachtaí, san eolaíocht agus innealtóireacht, sna heolaíochtaí sóisialta, lena n-áirítear an gnó, an dlí agus an t-oidreachas, chomh maith le cláir agus comhpháirtíochtaí idirnáisiúnta.

Cothaíonn an cultúr uathúil comhghleacúil atá le fáil in Ollscoil Mhá Nuad cur chuige idirdhisciplíneach i leith an taighde, cur chuige a chuireann ar chumas na foirne acadúla dul i ngleic le cuid de na dúshláin is mó atá le sárú ag sochaí an lae inniu. Daingníonn institiúidí agus ionaid taighde na hOllscoile tionchar na hoibre sin, trí phobail bhríomhara foghlama, fionnachtana agus chruthaitheachta a chothú. Bíonn an taighde ag croílár an teagaisc san Ollscoil freisin, agus is ábhar bróid don Ollscoil é go bhfuil an taighde agus an teagasc ar comhchéim san institiúid.

Prionsabail agus luachanna

Léiríonn ár luachanna cé muid féin, cén rud a gcreideann muid ann agus conas a iompraíonn muid féin mar phobal. Is orthu sin a bhraitheann an rath a bheidh orainn amach anseo, na hionchais atá againn dúinn féin agus dá chéile. Baineann ár luachanna le gach duine i bpobal na hOllscoile:

- Ionracas
- Comhghleacaíocht
- Freagracht
- Saoirse cainte
- Uaillmhian

Plean Straitéiseach Ollscoil Mhá Nuad 2023 - 2028

Tógann Plean Straitéiseach na hOllscoile 2023 - 2028 ar ár stair acadúil shaibhir agus ar ár mbunchlocha láidre chun conair uaillmhianach agus cheannródaíoch a leagadh amach do thodhchaí ár nOllscoile. Soiléiríonn an treochar seo ár dtiomantas do dhul i dtaithí ar dhomhan atá ag síorathrú agus ár ngníomhaíochtaí a chur in oiriúint dó, agus san am céanna a bheith dílis dár luachanna Ollscoile. Is í an fhís atá againn a bheith mar ollscoil feabhais, deiseanna agus tionchair, agus lámh láidir a bheith againn i ngach ceann de na trí ghné seo.

Léigh anseo le haghaidh breis eolais faoi thodhchaí Ollscoil Mhá Nuad:
<https://strategy.maynoothuniversity.ie/?lang=ga>

Roghnú agus Ceapadh

- Ní thabharfar cuireadh chun agallaimh ach d'iarrthóirí a n-éireoidh leo an gearrliosta a bhaint amach;
- D'fhéadfaí iarraidh ar na hiarrthóirí a dtabharfar cuireadh chun agallaimh dóibh scrúdú scríofa agus cur i láthair gairid a dhéanamh;
- Ceadóidh an tUachtarán ceapacháin bunaithe ar thuairisc an bhoird roghnúcháin;
- Táthar ag súil na haghallaimh a reáchtáil ag deireadh mhí Dheireadh Fómhair 2025;
- Táthar ag súil go mbeidh feidhm leis an gceapachán ó mhí na Samhna 2025, nó a luaithe agus is féidir ina dhiaidh sin.

Comhionannas agus Éagsúlacht

Tá Ollscoil Mhá Nuad tiomanta do bheith ina hinstiúid a chothaíonn comhionannas, a thugann meas agus luach don éagsúlacht, agus a chuireann an ionchuimsitheacht chun cinn. Chun tuilleadh eolais a fháil ar ár dtiomantas don Chomhionannas agus Éagsúlacht, féach ar na polasaithe seo a leanas:



[Polasáí Comhionannais agus Éagsúlachta](#) Ollscoil Mhá Nuad agus ár bpolasáí maidir le [Employment of People with Disabilities](#) agus ár [Gender Equality Action Plan 2023-2026](#)

Téarmaí agus coinníollacha

Téarma an chonartha	Is post sealadach páirtaimseartha (0.8FTE) é seo, go dtí 31.08.2028
Tuarastal	Oifigeach Riaracháin 1 (2025): €59,220 - €84,494 p.a pro-rata (9 bpointe) Post 0.8 FTE é seo (.i. 80% den tuarastal thuas). De réir fhorálacha pá na hearnála poiblí a dhéanfar ceapacháin.
Uaireanta oibre	Tá seachtain oibre 35 uair an chloig i bhfeidhm maidir le poist lánaimseartha. D'fhéadfaí athbhreithniú nó coigeartú a dhéanamh ar na huaireanta hoibre seo ó am go ham, bunaithe ar chomhaontuithe náisiúnta.
Áit	Is é campas Ollscoil Mhá Nuad, Maigh Nuad, Co. Chill Dara an áit oibre.
Saoire bhliantúil	Tugtar saoire bhliantúil agus laethanta saoire poiblí de réir pholasáí na hOllscoile: https://www.maynoothuniversity.ie/human-resources/policies/annual-leavepolicy Tugtar saoire bhliantúil ar bhonn pro rata i gcás poist pháirtaimseartha agus shealadacha.
Polasaithe agus scéimeanna Ollscoile	Beidh fostaithe de chuid na hOllscoile faoi réir pholasaithe agus scéimeanna na hOllscoile, atá ar fáil ar shuíomh gréasáin na hOllscoile ag: https://www.maynoothuniversity.ie/university-policies https://www.maynoothuniversity.ie/human-resources/policies
Pinsean	Is post inphinsin é seo. Glacfaidh fostaithe de chuid na hOllscoile páirt i scéim pinsin don earnáil phoiblí. Tá sonraí maidir leis na scéimeanna sin ar fáil ag: https://www.maynoothuniversity.ie/human-resources/pension-information

Incháilitheacht	Fáiltítear roimh iarratais ó shaoránaigh neamh-LEE. Ba chóir d'iarratasóirí a thabhairt faoi deara gurb í an Roinn Fiontar, Trádála agus Fostaíochta a rialaíonn incháilitheacht. Tá tuilleadh eolais maidir le hincháilitheacht ar fáil ag: https://enterprise.gov.ie/en/what-we-do/workplace-and-skills/employmentpermits/employment-permit-eligibility/ Tá iarratasóirí neamh-LEE freagrach as a chinntiú gur féidir leo víosa a fháil chun taisteal go hÉirinn. Tá aon tairiscint fostaíochta ag brath ar iarratasóirí na ceadanna fostaíochta cuí a fháil. Iarfhostaithe de chuid Sheirbhís Phoiblí na hÉireann - Srianata Áirithe ar Cháilitheacht D'fhéadfadh go gcuirfí isteach ar incháilitheacht iarratasóirí a bhí fostaithe roimhe seo ag eagraíocht de chuid Earnáil Phoiblí na hÉireann, agus a bhain leas as Scéim Iomarcaíochta de chuid Sheirbhís Phoiblí na hÉireann nó Scéim Dreasachta Scoir faoi na Scéimeanna thíos: • Comhaontú Comhchoiteann: Íocaíochtaí Iomarcaíochta le Seirbhísigh Phoiblí • Scéim Dreasachta um Luathscor (ISER) • Ciorclán na Roinne Sláinte agus Leanaí (7/2010) • An Roinn Comhshaoil, Pobail & Rialtais Áitiúil (Ciorclán LG(P) 06/2013) Ba cheart d'iarratasóirí a chinntiú go bhfuil siad i dteideal a bheith fostaithe arís i Seirbhís Phoiblí na hÉireann faoi théarmaí Scéimeanna dá leithéid. Ba cheart d'iarratasóirí ceisteanna faoi seo a chur faoi bhráid a gcuid iarfhóistoirí in Earnáil Phoiblí na hÉireann.
Grinnfhiosrúchán Garda	D'fhéadfadh go mbeadh grinnfhiosrúchán nó imréiteach Garda ag teastáil ón Ollscoil.
Scrúdú leighis	D'fhéadfadh go mbeadh scrúdú leighis ag teastáil ón Ollscoil mar choinníoll fostaíochta.

Dlí Cosanta Sonraí

Déanfaidh Ollscoil Mhá Nuad próiseáil ar shonraí pearsanta a thugann tú mar chuid de d'iarratas ar an ról seo de réir Pholasaithe Cosanta Sonraí na hOllscoile.

Le tuilleadh eolais a fháil faoi Pholasaithe Cosanta Sonraí agus Fógra Príobháideachais na hOllscoile, féach ar ár suíomh gréasáin: <https://www.maynoothuniversity.ie/data-protection>

Treoracha iarratais

Dáta deiridh:

23:30 (am na hÉireann) **Dé Domhnaigh, 12 Deireadh Fómhair 2025.**

Ní mór iarratais a dhéanamh ar an bpost trínár **dTairseach Earcaíochta ar Líne** ag an nasc seo a leanas: <https://www.maynoothuniversity.ie/human-resources/vacancies>

Caithfear iarratais a chur isteach faoin dáta deiridh agus faoin am a shonraítear thuas. Cealóidh an córas go huathoibríoch iarratais atá fós idir lámha ag an am deiridh ar an dáta deiridh sonraithe.

Ní ghlacfar le hiarratais mhalla.

Is fostóir comhdheiseanna í Ollscoil Mhá Nuad

Tá an post seo faoi réir Reachtanna na hOllscoile

